



ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

Գ Լ Խ Ա Վ Ո Ր Ք Ա Ր Տ ՈՒ Ղ Ա Ր

Հայաստանի Հանրապետություն, 0010, ք. Երևան, Տիգրան Մեծ 4, հեռ.՝ (+374 60) 830 840, (+374 60) 830 850  
Էլ-փոստ՝ info@competition.am, վեբ կայք՝ //www.competition.am

« 11 » 03 20 22 թ.  
No ԵԽՎ-550  
2

«ԲԱՐԻ ՍԱՄԱՐԱՑԻՆ» ՍԱՀՄԱՆԱՓԱԿ  
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ՏՆՕՐԵՆ  
ՊԱՐՈՆ ՀՈՎՀԱՆՆԵՍ ՀՈՎԱԿԻՄՅԱՆԻՆ  
(հասցե՝ ք. Երևան, Էրեբունի, Նոր Արեշ 22փ., 117)

Հարգելի՛ պարոն Հովակիմյան,

Մրցակցության պաշտպանության հանձնաժողովը (այսուհետ՝ Հանձնաժողով) 2022 թվականի մարտի 9-ի ««Բարի Սամարացին» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 98-Ա որոշմամբ (այսուհետ՝ թիվ 98-Ա որոշում) հարուցել է թիվ ՀԳ-00081/22 վարույթը:

«Բարի Սամարացին» սահմանափակ պատասխանատվությամբ ընկերության (այսուհետ՝ Ընկերություն) լավաճ լինելու իրավունքն իրացնելու նպատակով Ընկերությունը կարող է երկշաբաթյա ժամկետում Հանձնաժողով ներկայացնել գրավոր դիրքորոշում և այն հիմնավորող նյութեր հարուցված վարույթում քննարկվող հարցի վերաբերյալ: Ընկերության հիմնավոր միջնորդության հիման վրա երկշաբաթյա ժամկետը Հանձնաժողովի նախագահի գրությամբ կարող է երկարաձգվել մինչև երկշաբաթյա ժամկետով:

Տեղեկացնում ենք, որ.

1. «Նորմատիվ իրավական ակտերի մասին» օրենքի 31-րդ հոդվածի 2-րդ մասի համաձայն՝ տարիներով, ամիսներով կամ օրերով հաշվարկվող ժամկետների ընթացքն սկսվում է այն օրացուցային տարվա, ամսվա, ամսաթվի կամ վրա հասած իրադարձությանը հաջորդ օրվանից, որով որոշված է դրա ժամկետի սկիզբը:

2. Ընկերությունը թիվ 98-Ա որոշումն ստանալու օրվանից երկշաբաթյա ժամկետում Ընկերությանը վերագրվող իրավախախտման փաստն ընդունելու և իրավախախտման հետևանքները վերացրած լինելու դեպքում կարող է արագացված վարույթ կիրառելու:

մասին միջնորդություն ներկայացնել Հանձնաժողով, ընդ որում, արագացված վարույթի կիրառման արդյունքում պատասխանատվության միջոց կիրառելիս պատասխանատվության միջոցը չի կարող գերազանցել տվյալ իրավախախտման համար նախատեսված ամենախիստ պատասխանատվության միջոցի մեկ երկրորդը:

3. «Տնտեսական մրցակցության պաշտպանության մասին» օրենքի 94-րդ հոդվածի 1-ին մասի համաձայն՝ պատասխանատվության միջոց կիրառելիս Հանձնաժողովը հաշվի է առնում տվյալ իրավախախտման բնույթը, տևողությունը, իրավախախտման հնարավոր կամ փաստացի ազդեցությունը շուկայում մրցակցային իրավիճակի կամ սպառողների շահերի վրա, տնտեսավարող սուբյեկտի կողմից տվյալ խախտման կրկնակիությունը, եթե նախորդ խախտման համար պատասխանատվության միջոց կիրառելու օրվանից չի անցել հինգ տարի, տնտեսավարող սուբյեկտի դիտավորության աստիճանը, տնտեսավարող սուբյեկտի կողմից իրավախախտում կատարվելու շարժառիթները և հանգամանքները, տնտեսավարող սուբյեկտի կողմից իրավախախտում կատարվելու փաստն ընդունելու կամ Հանձնաժողովի հետ համագործակցելու հանգամանքը, պատասխանատվությունից ազատելու հիմքերը, տնտեսավարող սուբյեկտի վրա նշանակվող տուգանքի հնարավոր ազդեցությունը, տվյալ տնտեսավարող սուբյեկտի գործունեության ոլորտը և տնտեսավարող սուբյեկտի պատմությունը: Ընդ որում, «Վարչարարության հիմունքների և վարչական վարույթի մասին» օրենքի 43-րդ հոդվածի համաձայն՝ Ընկերության համար բարենպաստ հանգամանքների ապացուցման բեռը կրում է Ընկերությունը:

4. Պատասխանատվության միջոցի ընտրությունը և տուգանքի հաշվարկումն իրականացվում է Հանձնաժողովի 2021 թվականի դեկտեմբերի 28-ի թիվ 395-Ն որոշմամբ սահմանված մեթոդաբանությամբ:

Կից ներկայացվում է թիվ 98-Ա որոշման պատճենը:

Առդիր՝ «4» թերթ:

ՀԱՐԳԱՆՔՈՎ՝



ԱՇՈՏ ՎԱՀԱՆՅԱՆ

Կապարող՝ Արմենուհի Թադևոսյան

Անբարեխիղճ մրցակցության վերահսկողության վարչություն

Հեռ. (+374 60) 830-840 (245)



## ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

### Ո Ր Ո Շ ՈՒ Մ

9 մարտի 2022 թվականի թիվ 98-Ա

#### «ԲԱՐԻ ՍԱՄԱՐԱՑԻՆ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ԿՈՂՄԻՑ ՏՆՏԵՍԱԿԱՆ ՄՐՑԱԿՑՈՒԹՅԱՆ ԲՆԱԳԱՎԱՌՈՒՄ ԻՐԱՎԱԽԱՆՏՄԱՆ ՎԵՐԱԲԵՐՅԱԼ ՎԱՐՈՒՅԹ ՀԱՐՈՒՑԵԼՈՒ ՄԱՍԻՆ

Մրցակցության պաշտպանության հանձնաժողովը (այսուհետ նաև՝ **Հանձնաժողով**), 2022 թվականի մարտի 9-ի նիստում, քննարկելով «Բարի Սամարացին» սահմանափակ պատասխանատվությամբ ընկերության (այսուհետ նաև՝ **Ընկերություն**) կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին հարցը,

### Պ Ա Ր Զ Ե Ց

Հանձնաժողովի նախագահի՝ 2022 թվականի փետրվարի 2-ի թիվ ԳԳ-202 գրությամբ (այսուհետ նաև՝ **Գրություն**) Հանձնաժողովը դիմել է Ընկերությունը՝ պահանջով Գրությունը ստանալուց հետո 3 աշխատանքային օրվա ընթացքում Հանձնաժողով ներկայացնել տեղեկատվություն.

1. Ընկերության կողմից 2021 թվականի հոկտեմբերի 1-ից մինչև 2021 թվականի դեկտեմբերի 31-ն ընկած ժամանակահատվածում «Բժշկական Կլասիկ» և «Գերմանական» անվանումներով եփած, «Սայլամի Ֆրանսիական» անվանումով հում ապխտած, «Գյումրի» անվանումով կիսաապխտած երշիկների և «Լյուքս» անվանումով նրբերշիկի (այսուհետ՝ **Ապրանքներ**) իրացման ծավալները (բնեղեն արտահայտությամբ) և դրանցից յուրաքանչյուրի իրացումից ստացված հասույթի չափերի վերաբերյալ՝ առանձնացված ըստ յուրաքանչյուր ապրանքի և ըստ ամիսների,

2. Ընկերության կողմից 2020 և 2021 թվականներին Ապրանքներից բացի, այլ եփած, կիսաապխտած, հում ապխտած երշիկների և նրբերշիկների իրացումից ստացված հասույթի չափերի վերաբերյալ՝ առանձնացված ըստ յուրաքանչյուր ապրանքների և ըստ տարիների (ոչ ամբողջական տարի արտադրված լինելու դեպքում՝ ըստ ամիսների):

Ընկերությունը Գրությունը ստացել է 2022 թվականի փետրվարի 5-ին, որից հետո պարտավոր էր Գրությամբ պահանջված տեղեկատվությունը Հանձնաժողով ներկայացնել



մինչև 2022 թվականի փետրվարի 9-ը ներառյալ: Մինչդեռ, Ընկերությունը Գրությամբ պահանջված տեղեկատվությունը չի ներկայացրել:

Բացի այդ, Ընկերությունը 2022 թվականի փետրվարի 14-ին Հանձնաժողով է ներկայացրել գրություն, հայտնելով, որ նման տեղեկատվության ներկայացման համար անհրաժեշտ է հատ-հատ արտահանել յուրաքանչյուր հարկային հաշվի տեղեկատվությունը, այսինքն՝ իրացման գները, քանի որ դրանք տարբեր են, տեսականին, ծավալները և այլն: Դրա համար անհրաժեշտ է մշակել Ընկերության ծրագրերում և փաստաթղթերում առկա ողջ ինֆորմացիան, որի համար անհրաժեշտ է մեծ քանակի աշխատուժ և երկար ժամանակ: Նման տեղեկատվության հետ աշխատելու, այսինքն ծրագրից օգտվելու համապատասխան գիտելիքներին տիրապետում էր բացառապես Ընկերության գլխավոր հաշվապահը, ով, Ընկերության ծանր ֆինանսական դրությունից ելնելով, ներկայումս ազատվել է աշխատանքից:

Ընկերությունը հայտնել է նաև, որ ավելի քանի երեք ամիս է գործունեություն գրեթե չի իրականացնում, գտնվում է ֆինանսական ծայրահեղ ծանր վիճակում, ուստի նոր աշխատակից ներգրավելու հնարավորությունը նույնպես բացակայում է: Ուստի միջնորդել է երկրաձգել տեղեկատվության ներկայացման ժամկետը 15 աշխատանքային օրով, որպեսզի փորձի պարզել, արդյոք կարող է ներգրավել համապատասխան աշխատակից՝ նման տեղեկատվություն տրամադրելու համար:

Ընկերության կողմից Հանձնաժողով ներկայացված միջնորդությունն ըստ էության չի քննարկվել, քանի որ ներկայացվել է սահմանված ժամկետից հետո և ընդունվել է ի գիտություն:

«Տնտեսական մրցակցության պաշտպանության մասին» օրենքի (այսուհետ նաև՝ **Օրենք**) 43-րդ հոդվածի 2-րդ մասի համաձայն՝ Հանձնաժողովի նախագահի գրության կամ Հանձնաժողովի որոշման կամ օրենսդրությամբ սահմանված պահանջի հիման վրա տնտեսավարող սուբյեկտները պարտավոր են սահմանված ժամկետում ներկայացնել Հանձնաժողովի՝ օրենքով նախատեսված լիազորությունների իրականացման համար անհրաժեշտ փաստաթղթեր, նյութեր և այլ տեղեկատվություն, բացառությամբ եթե դրանց տրամադրումն արգելված է օրենքով:

Օրենքի վկայակոչված իրավադրույթի բովանդակային վերլուծության արդյունքում պարզ է դառնում, որ.

1. Օրենքով Հանձնաժողովին վերապահվել է տնտեսավարող սուբյեկտներից տեղեկատվություն պահանջելու լիազորություն, միաժամանակ սահմանվել է վերջիններիս՝ Հանձնաժողովին տեղեկատվություն ներկայացնելու պարտականությունը,
2. տեղեկատվություն պահանջելու Հանձնաժողովի լիազորության իրականացման կամ տեղեկատվություն ներկայացնելու տնտեսավարող սուբյեկտի պարտականության կատարման նախադրյալը պահանջվող տեղեկատվության՝ Հանձնաժողովի լիազորությունների իրականացման համար անհրաժեշտ լինելն է,
3. Հանձնաժողովին տեղեկատվություն ներկայացնելու պարտականության ծագման հիմքերն են՝ Հանձնաժողովի նախագահի գրությունը, կամ Հանձնաժողովի որոշումը կամ անմիջականորեն օրենսդրությամբ սահմանված պահանջը:

Ընդ որում, տեղեկատվության տրամադրումը պետք է իրականացվի հետևյալ պահանջների պահպանմամբ.

1) ներկայացվի Հանձնաժողովի նախագահի գրությամբ կամ Հանձնաժողովի որոշմամբ կամ օրենսդրությամբ սահմանված ժամկետում,

2) լինի ամբողջական,

3) լինի հավաստի:

Տվյալ դեպքում Գրությամբ Ընկերությունից պահանջվել է Հանձնաժողով ներկայացնել տեղեկատվություն: Ընկերությունը Գրությունը ստացել է 2022 թվականի փետրվարի 5-ին, որից հետո պարտավոր էր Գրությամբ պահանջված տեղեկատվությունը Հանձնաժողով ներկայացնել մինչև 2022 թվականի փետրվարի 9-ը ներառյալ: Սակայն Ընկերությունը պահանջված տեղեկատվությունը չի ներկայացրել ոչ միայն սահմանված ժամկետում, այլև իր կողմից նշված՝ 15 աշխատանքային օրը լրանալուց հետո: Հետևաբար Ընկերության վարքագիծն առերևույթ պարունակում է Հանձնաժողովին տեղեկատվություն տրամադրելու հարցում տնտեսավարող սուբյեկտի պարտականության խախտման հատկանիշներ:

Օրենքի 92-րդ հոդվածի համաձայն՝ տնտեսական մրցակցության բնագավառում իրավախախտման համար Հանձնաժողովն իրավասու է տնտեսավարող սուբյեկտներին, պետական մարմիններին և դրանց պաշտոնատար անձանց տալու նախազգուշացում կամ նշանակելու տուգանք:

Օրենքի 93-րդ հոդվածի 9-րդ մասի համաձայն՝ վարույթով պատասխանող տնտեսավարող սուբյեկտի կողմից Հանձնաժողովի նախագահի գրությամբ կամ Հանձնաժողովի որոշմամբ կամ օրենսդրությամբ սահմանված փաստաթղթեր կամ այլ տեղեկատվություն սահմանված ժամկետում չներկայացվելու կամ ոչ հավաստի կամ ոչ ամբողջական տեղեկություններ ներկայացվելու համար նշանակվող տուգանքի չափը կազմում է մինչև վարույթով քննարկվող իրավախախտման համար սահմանված տուգանքի չափը, իսկ մի քանի խախտումների դեպքում՝ դրանց համար սահմանված առավել խիստ տուգանքի չափը:

Օրենքի 93-րդ հոդվածի 7-րդ մասի համաձայն՝ անբարեխիղճ մրցակցության համար նշանակվող տուգանքի չափը կազմում է տնտեսավարող սուբյեկտի՝ տվյալ իրավախախտմանը նախորդող տարվա հասույթի մինչև հինգ տոկոսը:

Օրենքի 93-րդ հոդվածի 13-րդ մասի համաձայն՝ նախորդ տարում 12 ամսից պակաս գործունեություն իրականացրած լինելու դեպքում սույն հոդվածով նախատեսված տուգանքների չափը կազմում է իրավախախտմանը նախորդող, բայց ոչ ավելի, քան 12 ամսվա գործունեության ժամանակահատվածի հասույթի նկատմամբ սույն հոդվածում նախատեսված տոկոսը:

Հաշվի առնելով վերոնշյալը՝ Հանձնաժողովն անհրաժեշտ է համարում Ընկերության կողմից տնտեսական մրցակցության բնագավառում իրավախախտման հատկանիշների առկայությունը պարզելու նպատակով հարուցել վարույթ:

Հիմք ընդունելով վերոգրյալը և ղեկավարվելով Օրենքի 76-րդ հոդվածի 1-ին մասի 3-րդ ենթակետը, 79-րդ հոդվածի 3-րդ մասի 1-ին կետը, 83-րդ հոդվածի 1-ին մասը և 42-րդ հոդվածի 2-րդ մասը՝ Հանձնաժողովը

## Ո Ր Ո Շ Ե Ց

1. «Բարի Սամարացին» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ հարուցել վարույթ:
2. Սույն որոշումն ուժի մեջ է մտնում ընդունման պահից:

ՆԱԽԱԳԱՀ

2022 թ. մարտի 9  
Երևան



Գ. ԳԵԿՈՐԳՅԱՆ

